



30. maj 2012

Inatsisartut Suleriaasianni § 37 naapertorlugu Naalakkersuisunut apeqquq imaattoq matumuuna saqqummiuppara:

Naalakkersuisunut apeqquq:

- 1. Tarnimikkut nappaatilinnik katsorsaannermi periutsip Maniitsumi ineriartortitap siaruarternissaa pillugu Naalakkersuisut sunik suliniuteqarnikuuppat?**
- 2. Tarnimikkut nappaatilinnik katsorsaannermi periutsip Maniitsumi ineriartortinneqartup tamakkiisumik atorneqalersimanissaata pinissaa qaqugu Naalakkersuisut naatsorsuutigaa?**

(Inatsisartunut ilaasortaq Jørgen-Ole Nyboe Nielsen, Demokraterne)

Tungavilersuut:

Tarnimikkut nappaatilinnik katsorsaannermi nutaamik eqqarsarluarnissaaq pisariaqartinneqarpoq. Inuuneq nalilik attatissagaanni sianissutsikkut peqqissuunissaaq taavalu peqqissuunissaaq pisariaqarput – eqqarsaatigalugit inuit ataasiakkaat, ilaqutariit inuiaqatigiillu. Tarnimikkut nappaatilinnik katsorsaannermi napparsimasut artornarnerpaat naapitassaapput, Demokraatinilu isumaqarpugut tarnimikkut napparsimasut pitsaanerpaamik ikiussagaanni assigiinngitsunik ilinniagallit suleqatigiinnerunissaat pisariaqartoq.

2011-mi Ukiakkut ataatsimiinnermi Demokraatit sinnerlugit Inatsisartuni ilaasortap Astrid Fleischer Rexip Naalakkersuisut peqquneqarnissaannik Inatsisartut aalajangiiffigisassaattut siunnersuutaa oqallisigigaat.

Tarnimikkut nappaatilinnik katsorsaannermi Maniitsumi periutsimik siammartereqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

Oqallinnermi erserpoq, Inatsisartuni amerlanerussuteqartut kissaatigigaat periutsip siammarterneqarnissaa aamma Inatsisartuni ilaasortat tamarmiullutik oqallinnermut atatillugu oqaatigaat:



Inatsisartut kaammattuutigaat, Naalakkersuisut sulissutigissagaat tarnimikkut nappaatilinnik katsorsaannermi Maniitsumi periutsip sapinngisamik siammarterneqarnissaa.

Demokraatini taamatut oqaaseqaateqartoqarnera iluarisimaarparput, Maniitsumi periuseq siammarterneqarpat iluatissarpasuit takusinnaagatsigit. Naatsumik oqaatigalugu Maniitsumi periuseq pinngorpoq 2003-2004-mi, assigiinngitsunik ilinniagallit katsorsaasussatut suleqatigiit pilersinneqarmata, peqataallutik tarnimikkut nappaatilinnik katsorsaavimmeersut, peqqinnissaqarfimmeersut, pinerlussimasunik nakkutilliivimmeersut kiisalu politiineersut. Katsorsaasussat suleqatigiit suliassaraat tarnimikkut napparsimanerpaanik ikiuinissaq, ataatsimiittarnerit aalajangersimasut, ataavartut aaqqissuulluakkallu aqcutigalugit. Periutsimi misilittakkat kusanartupilussuupput taamaattumik Demokraatini kissaatigaarput periutsip Kalaallit Nunaata sinneranut siammarterneqassasoq.

Ukioq ataaseq qaangiusimalerpoq Inatsisartut isumaqatigiillutik qulaani taaneqartoq oqaaseqaat isumaqatigiissutigimmassuk aamma taamaattumik Demokraatini isumaqarpugut pissusissamisoortoq, Inatsisartut kissaataata piviusunngortinnissaanut suliat aallartinneqarsimasut killiffii pillugit Naalakkersuisut saqqummiussaarpata.

Apeqqutit akeqquneqarput piffissarititaasut ullut suliffiit naliginnaasut qulit ingerlanerisa iluanni.